

শ্রী একাদশ স্কন্ধের বিংশ অধ্যায়ে নবম শ্লোকে শ্রীভগবান্ উদ্ধবকে বলিয়াছেন—

“তাবৎ কৰ্ম্মাণি কুৰ্ব্বীত ন নির্বিঘ্নেত যাবত।

মৎকথা শ্রবণাদৌ বা শ্রদ্ধা যাবন্ন জায়তে ॥”

হে উদ্ধব ! ততদিন পর্য্যন্ত জ্ঞানীর কৰ্ম্ম করিতে হইবে, যতদিন পর্য্যন্ত পারমেষ্ঠ্য-সুখাদিতে থুথুংকার-বুদ্ধি না জন্মিবে। আর ভক্তকেও ততদিন পর্য্যন্ত কৰ্ম্ম করিতে হইবে, যতদিন পর্য্যন্ত আমার কথা শ্রবণ-কীর্তনাদিতে দৃঢ় বিশ্বাস না জন্মিবে। এই শ্লোকে শ্রদ্ধা এবং বিরক্তি—এই দুইটাই পরস্পর নিরপেক্ষ, অর্থাৎ শ্রদ্ধাও বিরক্তির অপেক্ষা করে না এবং বিরক্তিও শ্রদ্ধার অপেক্ষা করে না। এই দুইটিরই এইপ্রকার নিয়ম বা সীমা নির্দেশ করা হইয়াছে। অর্থাৎ জ্ঞানীর ঐহিক পারলৌকিক সমস্ত সুখে বিরক্তির উদয় না হওয়া পর্য্যন্ত জ্ঞানীকে কৰ্ম্ম করিবার আদেশ করা হইয়াছে এবং ভক্তেরও শ্রীহরিকথা শ্রবণ-কীর্তনাদিতে দৃঢ় বিশ্বাস উপস্থিত না হওয়া পর্য্যন্ত কৰ্ম্ম করিবার আদেশ দেওয়া হইয়াছে। কিন্তু এই দুই অধিকারীই যদি সেই সীমা প্রাপ্ত না হইয়া অর্থাৎ জ্ঞানী ঐহিক পারলৌকিক সুখভোগে বিরক্তি-পূর্বক ব্রহ্মজিজ্ঞাসায় প্রবৃত্ত না হইয়া কৰ্ম্মত্যাগ করেন, এবং ভক্ত সতত শ্রীহরিকথা শ্রবণ-কীর্তনাদিতে দৃঢ় শ্রদ্ধার সহিত প্রবৃত্ত না হইয়া কৰ্ম্ম ত্যাগ করেন, তাহা হইলে বেদবিহিত কৰ্ম্মের অননুষ্ঠান রূপ বিকৰ্ম্মানুষ্ঠানে মৃত্যুর পর মৃত্যু অর্থাৎ মরণতুল্য যাতনা প্রাপ্ত হইয়া থাকেন ; পুনঃ পুনঃ মৃত্যু ও যাতনা প্রাপ্ত হইয়া থাকেন—শ্লোকের এইরূপ অভিপ্রায় বুঝিতে হইবে। অতএব কৰ্ম্মত্যাগে অনধিকারী ব্যক্তিসকলের বেদবিহিত কৰ্ম্ম ত্যাগ করিলে কোনও প্রকারেই নিস্তার নাই। যে কৰ্ম্মের প্রযোজক কর্তা ঈশ্বর, সেই কৰ্ম্ম ঈশ্বরে অর্পণ করিয়া অনুষ্ঠান করিলে যথার্থ অনুষ্ঠান করাহয়। এইজন্য শ্রীভগবানের প্রসন্নতা লাভ করিতে পারিলে মৃত্যু-যাতনা ভোগ করিতে হয় না। এই কথাটি একটি শ্লোকে বলিতেছেন—“বেদোক্তমেব কুৰ্ব্বাণঃ”। এই শ্লোকের ব্যাখ্যাটি করিতেছেন—“অতএব বেদোক্ত কৰ্ম্মই করিবে, কখনও বেদনিষিদ্ধ কৰ্ম্ম করিবে না, এবং সেই বেদবিহিত কৰ্ম্ম ও কৰ্ম্মফল ভগবানে অর্পণ করিয়া অনুষ্ঠান করিলে কৰ্ম্মবন্ধের অগোচর নৈষ্কৰ্ম্ম্য-সিদ্ধি লাভ করিয়া থাকে”। অর্থাৎ এইরূপ ভাবে কৰ্ম্মানুষ্ঠান করিতে করিতে কৰ্ম্মবন্ধন নিবৃত্তি হইয়া ঐহিক পারলৌকিক সুখভোগে বিতৃষ্ণা জন্মিয়া থাকে। এই কথার উপরে একটা আশঙ্কা থাকিতে পারে যে, কৰ্ম্মানুষ্ঠান করিলে কৰ্ম্মের আসক্তি অবশ্যই হইয়া থাকে এবং সেই কৰ্ম্মানুষ্ঠানজনিত তাহার একটি